

文昌帝君陰騭文經

水讚

先天真水 淨洗靈台 楊枝一滴洒塵埃  
凡境即蓬萊 滌穢消災 香林法界開  
太上皈命禮蕩魔解穢大天尊（三稱）

香讚

祥雲乍熱 法界氤氳 羅天海嶽異香騰  
到此覆慈雲 達信通誠 萬聖盡遙臨  
太上皈命禮香雲浮蓋大天尊（三稱）

祝香神咒

道由心學 心假香傳 香爇玉爐 心存帝前  
真靈下盼 仙旆臨軒 令生關告 逕達九天

淨口神咒

羅千齒神 卻邪衛真 喉神虎賁 氣神引津  
心神丹元 令我通真 思神鍊液 道氣長存

淨心神咒

太上台星 應變無停 驅邪縛魅 保命護身  
智慧明淨 心神安寧 三魂永久 魄無喪傾

淨身神咒

靈寶天尊 安慰身形 弟子魂魄 五臟玄冥

青龍白虎 隊仗紛紜 朱雀玄武 侍衛我身

安土地神咒

元始安鎮 普告萬靈 嶽瀆真官 土地祇靈  
左社右稷 不得妄驚 回向正道 內外澄清  
各安方位 備守宮庭 太上有命 搜捕邪精  
護法神王 保衛誦經 皈依大道 元亨利真

淨天地神咒

天地自然 穢氣分散 洞中玄虛 晃朗太元  
八方威神 使生自然 靈寶符命 普告九天  
乾羅答那 洞罡太玄 斬妖縛邪 度眾萬千

中山神咒 元始玉文 持誦一遍 卻病延年  
按行五嶽 八海知聞 魔王束首 侍衛我軒  
凶穢消散 道氣長存

金光神咒

天地玄宗 萬氣本根 廣修億劫 證帝神通  
三界內外 惟道獨尊 體有金光 覆映帝身  
視之不見 聽之不聞 包羅天地 養育群生  
誦持萬遍 身有光明 三界侍衛 五帝伺迎  
萬神朝禮 役使雷霆 鬼妖喪膽 精怪亡形  
內有霹靂 雷神隱名 洞慧交徹 五氣騰騰

金光速現 覆護真人 急急如  
玉皇上帝光降如律令

五星神咒

五星列照 煥明五方 水星卻災 木德致昌  
熒惑消禍 太白辟兵 鎮星四據 家國利亨  
名刊玉簡 字錄帝旁 乘飆散景 飛騰太空  
出入冥無 遊宴十方 五雲浮蓋 招神攝風  
役使萬靈 上衛仙翁

三皈依

稽首皈依道 道在玉京山 玉京山說法

說法利人天 皈依元始大天尊

稽首皈依經 經寶演靈文 靈文書鳳篆

鳳篆廣宣揚 皈依靈寶大天尊

稽首皈依師 師心似水清 水清秋月現

月現廣無邊 皈依道德大天尊

太上皈命禮三清道祖大天尊（三稱）

文昌帝君寶誥 志心皈命禮

九天大帝 七曲文昌雷杼炳靈於鳳山 如意  
儲祥於鰲岫 不驕不樂 職盡天官地水官  
至孝至仁 功存儒教釋道教 為一十七世

之榮貴 濟困扶危 顯九十八化之行藏  
延嗣錫祿 栽培氣運 十則屬戒淫之歌  
救正人心 八反為孝親之要 培桂根於陰  
鷲 普濟慈航 積善果於詩書 齊登彼岸  
道則高矣 神而明之

大悲大願 大聖大慈 九天開化

文昌帝君宏仁大帝更生永命天尊（三稱）

文昌帝君丹桂籍

帝君曰 吾一十七世 為士大夫身 未嘗虐  
民酷吏 救人之難 濟人之急 憫人之孤

容人之過 廣行陰鷲 上格蒼穹 人能如

吾存心 天必錫汝以福 於是訓於人曰

昔于公治獄 大興駟馬之門 竇氏濟人

高折五枝之桂 救蟻中狀元之選 埋蛇享

宰相之榮 廣福田須憑心地 行時時之方

便 作種種之陰功 利物利人 脩善脩福

正直代天行化 慈祥為國救民 存平等心

擴寬大量 忠主孝親 敬兄信友 和睦夫

婦 教訓子孫 毋慢師毋侮聖賢 或奉真

朝斗 或拜佛念經 報答四恩 廣行三教

談道義而化奸頑 講經史而曉愚昧 濟急  
如濟涸轍之魚 救危如救密羅之雀 矜孤  
恤寡 敬老憐貧 舉善薦賢 饒人責己  
措衣食 周道路之饑寒 施棺槨 免尸骸  
之暴露 造漏澤之仁園 與啟蒙之義塾  
家富提攜親戚 歲饑賑濟鄰朋 斗秤須要  
公平 不可輕出重入 奴僕待之寬恕 豈  
宜備責苛求 印造經文 創修寺院 捨藥  
材以拯疾苦 施茶水以解其渴煩 點夜燈  
以照人行 造河船以濟人渡 或買物而放  
生 或持齋而戒殺 舉步常看蟲蟻 禁火  
莫燒山林 勿登山而網禽鳥 勿臨水而毒  
魚蝦 勿宰耕牛 勿棄字紙 勿謀人之財  
產 勿妒人之技能 勿淫人之妻女 勿唆  
人之爭訟 勿壞人之名節 勿破人之婚姻  
勿因私讎 使人兄弟不和 勿因小利 使  
人父子不睦 勿倚權勢 勿辱善良 勿恃  
富豪而欺窮困 依本分而致謙恭 守規矩  
而遵法度 和諧宗族 解釋冤怨 善人則  
親近之 助德行於身心 惡人則遠避之

杜災殃於眉睫 常須隱惡揚善 不可口是  
心非 恆記有益之語 罔談非體之言 剪  
礙道之荆榛 除當途之瓦石 修數百年崎  
嶇之路 造千萬人來往之橋 垂訓以格人  
非 捐資以成人之美 作事須循天理 出  
言要順人心 見先哲於羹牆 慎獨知於衾  
影 諸惡莫作 眾善奉行 永無惡曜加臨  
常有吉神擁護 近報則在自己 遠報則在  
兒孫 百福駢臻 千祥雲集 豈不從陰鷲  
中得來者哉

### 文昌帝君讚

香飄翰范 統理玉清 千秋澤德證功名  
振文利眾生 信受奉行 四方享昇平

太上皈命禮文昌帝君大天尊（三稱）

### 求智慧咒

唵婆囉 婆囉 三婆囉 三婆囉 印涅隸野  
彌輪阨厄 唵嚕唵嚕 折利曳娑訶（三遍）